

廣西名勝志

廣西名勝志

廣西名勝志卷之三



閩中曹學佺能始



平樂府

在省城南
二百里

領州一縣七



唐武德初以始安郡之平樂縣置樂州貞觀改名
昭州元大德間陞州為平樂府大明因之唐
李商隱昭州詩桂水春猶早昭州日正西虎當官
路闢猿樓驛樓啼繩爛金沙井松乾乳洞梯鄉音
殊可駭仍有醉如泥宋梅摯云我愛昭州路優游
不嶮崎九疑通舜堦八桂逸秦祠亭堠相望處漁
樵有讓時政平無虎關莫信義山詩天繪亭夷

堅志云昭州郡國有亭名天繪建炎中郡守李丕
以興金國年號同欲更之乞名於徐師川久而未
得有范某者為易曰清輝已揭勝而師川來謁李
視積壤中有片石斑斑如有文字取而滌之乃此
亭舊紀其畧云予擇勝得此亭名以天繪取其景
物自然也後某年月日當有俗子易名清輝者可
為一笑考其命名之日與此不差今亭在西山福
聖寺攷亦不存 明宣德間知府唐復字永亨毘
陵人嘗葺郡治建書樓于府學明倫堂復繪古勤
學者以風諸生名曰昭文 西山即昭山也距城

西百步灘樂二水匯有巨石逕百尺屹立水中其石正方如印亦名印山 按灘江發源陽海自桂林府來至平樂乃名府江以昭州及平樂縣在唐宋之季俱屬桂林水經注曰孫吳割蒼梧之境立以為縣北隸始安是也平樂至元時始得自稱府而府江之名本于此 水經注云始安谿水又西南注于灘水謂之平水志云樂水源出富川上鄉越恭城縣遠至郡城入于灘灘樂二水匯處蓄而為潭其深莫測名曰昭潭下為十六灘最險峻今昭潭驛沿其名又上有更鼓灘荔浦江自西南注

之曰荔浦江口舊平樂縣設此 古州城在府西
南樂山里相傳隋唐時築今訛為孤州唐中書令
崔玄暉與東張之等謀誅張昌宗奉中宗復辟後
因武三思譖貶玄暉古州司馬尋遣人殺之於此
唐刺史敬超先與杜甫善甫寄高適詩序有云
今海內忘形故人獨漢中王瑤昭州敬使君超先
在耳城北龍興觀有敬公井尚存 明督學使蘇
濬沿革論曰昭介桂梧西北近楚清湘九疑鬱相
樛焉東南入梧巨石急灘如坂上走九溪峒林樾
多為強人所盤據一夫不靖醜類陸梁近且芟夷

而蘊崇之刊山通道展為周行而又增置樓船繕
修校壘迺令軍騎直馳往來如織重裝下上帖席
而安蓋千百世之利哉郡治故寥濶山田仰泉不
甚作苦茆茨竹戶魚鹽粗給庶幾稱小康云 府

城宋治平元年太守汪齊築至乾道乙酉歲太守
葛永慶修治之議鑿後山為壕不果 國朝洪武
十三年增設守禦千戶所始拓開于外三里合之
得五百四十有一丈 廢樂州城在府西南三里
唐武德初刺史汪齊築 廢永平縣在府東北
歷塘村隋開皇置宋開寶中廢 廢龍平縣在府

東南百六十里梁靜州及龍平郡唐富州皆治于此今屬昭平縣思慙里

平樂縣

附郭

釋詳府下然縣自吳甘露元年分富川置則先于府久矣 鳳凰山據城東北勢如飛鳳層松千株干霄拂雲為一方之形勝有梅公亭遺址宋景祐中龍圖梅公摯守郡時建 南山在昭潭南岸雙峯挺出峯下有巖深廣數丈資聖寺設焉 東山距城一里多竹木宋嘉祐中里人太子中舍韓迴澹于仕進隱焉號東山野叟轉運李師中有詩題

其隱所 仙宮嶺在府城北宋元符間鄒浩謫居
以江水不可飲汲於數里外後所居嶺下忽有泉
湧出因名感應自銘之曰有穹其山有澄其淵動
惟厥以時出斯泉沛然莫遏其源我感我應其來
自天及將北歸數日前泉乃涸浩使人濬之乃於
亂石下得蟹一枚自放於江曰予至五嶺不見此
物數年矣亂石之下又非所宜穴也何從而出耶
易不云乎物不可以終難故受之以解蟹者解也
天寔告之矣是夜有人至門厲聲呼曰侍郎歸矣
求之不見次日果獲賜環 徐師川集有訪鄒道

鄉故居詩序云十一月九日携二監子選單秀才
步出古觀之西北求鄒侍_郎忠公寓舍於拾青閣
故基其詩云履霜頗强健晨興恣所適兩兒休籃
輿呼客同蠟屐危橋出隘巷憑高聊物色蒿然但
林莽蕪廢長荆棘井竈那復遺江山依舊碧要知
千載下懷賢求所歷按師川名俯黃魯直之甥也
魯直謫宜州師川來訪舅氏魯直卒俯寓昭州者
久之 道鄉書院舊碑 國朝嘉靖丁未歲縣令
李圭于道中得井欄一面滌其泥穢有字漸露乃
斷碑也遂徧求之更得數片惜不能成章乃為置

之學宮其詩曰道鄉書院久銷沈誰憶殘碑此日

尋天為忠賢留勝跡人於夢寐感知音貞珉肯逐

風雷變妙画元非鬼物侵讀罷益增今昔感斗山

應借重儒林忠公同時有元光者昭平人嘗從

公遊公亦至其家及放歸有詩別光云不因投鼠

抵昭平那得相逢一笑親塵裏豈知居士意山中

聊見宰官身周顒尚以家為累元亮惟知酒是真

莫逆于心更何語撥開船子過膠津眉山在城

東南九里峯巒秀聳宛如眉黛故名又里許為縈

山山有九峯縈紆曲折莫窮其致白雲巖在城

東十里叢林蓊蔚洞門翼然有古藤盤繞之其中
寥廓盛夏常寒成聲肖象之屬甚夥 華蓋山在
城西十里夕陽返照有似火焰 國初解縉詩云
火焰山危下夕陽卽此山也 密山在城北十里
羣峯迴合環擁郡治故名近城五里有龍嶽峯宋
鄒忠公得志軒云前有峯數十仞曰龍嶽卽此一
名龍躍考槃之水出焉跨澗有橋曰覽勝 聖山
穿山誕山俱在縣東北樂山里聖山者以譚氏二
仙女尸解于此而名巍峩插天絕頂高平俗呼仙
殿石前有梳粧臺左右列翠竹二枝仙子將飛騰

清風徐來疎簾拂座爽氣瀟然 穿山三峯並立
半壁開一圓竅可通往來 誕山亦有三峯譚氏
二女產此山下及長修黃老之術不知所之一日
里人以不雨為憂二女至謂之曰汝能餉我即可
得雨翁第餉之未信也二女甫去果大雨如注翁
知其神追覓不見山下呼之則上應山上呼之則
下應循至一巨石四周無草木二女之衣帶在焉
翁異之白其事於眾是後恒見二女於石上櫛髮
因建廟山下祀焉 後唐陶英字世民世為青州
人累官太尉天祐二年上書言事指斥時政忤朱

全忠因授太尉征南將軍領兵八萬出鎮昭州故
以疎之明年全忠篡位英懼禍隱于誕山家焉同
時有李太尉者簪纓相似子孫累代締姻其山下
有峒因目為陶李峒 誕山之水北流至榕津與
沙江合即故沙亭縣也其上有走馬坪 縣之津
平里在虎步江口有廢茶城縣址其上有目巖高
數十丈下有巨石近頂左右有兩小巖宛如人目
黑白分明見荊州風土記

賀縣

在府東二
百八十里

本秦臨賀縣三國吳以為郡隋平陳改置州唐宋

如之臨賀皆為治所 國朝省臨賀入州後又改
州為縣宋之省封陽蕩山元之省桂嶺皆析臨賀
置者今為桂嶺蕩山等鄉 按桂嶺一名臨賀漢
書張耳傳秦有五嶺之戍廣州記大庾始安臨賀
桂陽揭陽謂之五嶺是也盛弘之荊州記云臨賀
山中有二竹大數十圍有盤石徑四五丈清滑如
棋局二竹屈垂拂掃石上絕無塵穢未至數十里
風吹竹音如笙簫臨水出焉流合賀水元和郡縣
志云臨水一名賀水源出富川即此水也臨賀水
逕龍門灘水深百尋大魚自躍登此門化為龍不

過者曝腮點額右在縣東南一名龍谿 浮山在
縣東十里挺出江中雖洪濤汎漲此山不沒上有
迎碧亭 甌山在縣西十里高千餘丈舊名幽山
唐刺史李邵來遊名瑞雲宋守鄧璧以此山多雲
氣因改今名其上有泉注為池名曰仙池 仙池
之水流入橘江以注于賀而玉山泉天堂嶺之水
皆注焉按玉泉山在縣西北天堂嶺在縣南各去
十里其泉皎潔四時不絕縣北二十里有七十二
峯攢奇競秀其中多橘是曰橘山乃橘水之源也
唐時有銅冶今廢 按莫休符風土記云天師舊

宅在賀州道錄以為玄中大法師今以宅為廟廟
中有美異果實往來人食之無患惟勿採取取必
致禍 唐書李邵列傳邵字子玄延唐人因劉蕡
對策切直為時宰所抑邵與裴休杜牧等二十二
人中第邵曰劉蕡下第我輩登科能無厚顏疏言
蕡策漢魏以來無與比臣對不及蕡遠甚乞回所
授以旌蕡直不報為賀州刺史賀人愛之至改甑
山曰瑞雲云其時咸通間宰相韋保衡出為賀州
刺史留意吏事不以舊宰輔自居人亦稱之 宋
大中祥符時道州人周輔成舉進士授賀州桂嶺